



PERDANA LIBRARY  
PERDANA LEADERSHIP FOUNDATION  
NEWSPAPER CLIPPING

Newspaper	Utusan Malaysia
Date	15/2/2012

## RM2 juta biasiswa Yayasan Proton kepada 30 pelajar IPT

KUALA LUMPUR 14 Feb. - Proton Holdings Berhad menerusi Yayasan Proton memperuntukkan RM2 juta tahun ini sebagai biasiswa kepada 30 mahasiswa yang mengikuti program ijazah sarjana muda.

Peruntukan disampaikan oleh Penasihat Proton, Tun Dr. Mahathir Mohamad kepada mahasiswa berkenaan yang menuntut di 14 institusi pengajian tinggi awam (IPTA) dan swasta.

Dalam ucapannya, Dr. Mahathir mengingatkan mahasiswa supaya menerapkan sikap positif terhadap pekerjaan yang diceburi.

"Ilmu tidak menjamin masa depan yang lebih baik jika kita tidak mempunyai sikap positif terhadap pekerjaan yang dibuat," katanya.

Beliau berkata demikian pada majlis penyerahan biasiswa tersebut yang turut dihadiri oleh Pengerusi Proton Holdings, Datuk Seri Mohd Nadzmi Salleh; Pengerusi Yayasan Proton, Datuk Jaafar

Indot dan Pengarah Kumpulan Sumber Manusia Proton, Suhaimi Sulong di Subang Jaya, dekat sini, hari ini.

Menurut Dr. Mahathir, mahasiswa mesti mempunyai perasaan malu jika gagal menghasilkan kerja yang baik.

"Ini yang diamalkan oleh pekerja di Jepun, mereka malu jika hasil kerja yang dibuat tidak memuaskan hati apatah lagi pihak majikan," katanya.

Dalam pada itu, Jaafar berkata, penerima biasiswa berkenaan turut ditawarkan pekerjaan dalam Proton setelah tamat pengajian masing-masing.

"Kita telah laksanakan sejak 1994 sejajar usaha untuk melahirkan pekerja mahir dan profesional dalam perniagaan yang dijalankan," katanya.

Sejak 1994, Proton Holdings telah memperuntukkan RM12 juta sebagai biasiswa kepada 140 pelajar yang mengikuti pengajian di peringkat ijazah sarjana muda.



DR. Mahathir Mohamad menyampaikan sijil biasiswa kepada pelajar jurusan Ijazah Pengurusan Sumber Manusia dari Universiti Tenaga Nasional, Ruhilamani Said di Grand Desert Regency, Subang Jaya, semalam.